

# INUIT ATAQATIGIIT

## Inatsisartuni



25. juli 2018

Inatsisartut suleriaasianni § 37, imm. 1 naapertorlugu matumuuna Naalakkersuisunut imaattumik apeqquteqaateqarpunga.

### **Naalakkersuisunut apeqqut:**

- 1. Nunatta avataaniit tingerlaataannarsorlutik nunatsinnut tikittartut, nunattalu iluani angalasartut, ukiumut qassit tikittarnersut Naalakkersuisut ilisimasaqarfiginerpaat?**
  - a. Nunatsinnut isernissaminnut qinnuteqaqqaartarpat aamma akileraartinneqartarpat? Aappiuppat qanoq akileraartinne-qartarpat?**
  - b. Ukiumut tikittartut ukiuni kingullerni amerliartorpat? Aappiuppat qanoq amerliartortigaat?**
- 2. Tingerlaataannarsorlutik nunatsinnut tikittartut, suna pillugu nunatsinnukartarnersut aammalu nunatsinni sulerisarnersut Naalakkersuisut ilisimasaqarfiginerpaat?**
- 3. Nakkutigineqarnerat qanoq ingerlava aamma kikkunnit nakkutigineqartarpat?**
  - a. Nakkutigineqartarpat? Soorlu Nunatta imartaanut appakaakkaangata, nunatta iluani aammalu nunatta imartaa qimaleraangassuk misissorneqartarpat?**
- 4. Tingerlaataannarsorlutik angalasut nakkutiginerulerumallugit Naalakkersuisut qanoq pilersaaruteqarpat?**
- 5. Nakkutillineq annertusineqassappat, aningaasatigut qanoq kinguneqarsinnaanera Naalakkersuisut qanoq naatsersuuteqarpat? Kiallu nakkutigissavai?**

(Inatsisartuni ilaasortaq Peter Olsen, Inuit Ataqatigiit)

### **Tunnngavilersuut:**

Ukiuni kingullerni nunatta avataaniit tingerlaataannarsorlutit nunatsinnut tikittartut maluginiartalersimavakka.

Alutornarpoq aamma nuannerpoq angalasunit tamakkuninnga nunarput aamma soqutigineqarluarmat.

Taamakkaluartoq innuttaasut akornannit alutorineqaannaratik, nunatsinni sunersut sulerinersullu aamma paaserusunneqartalerpoq apeqquserneqartalerlutillu.

Inuit ilaat kiisa eqqoriaasalersimapput; Kissaviarsuinngooruna manniinik anngiortumik nunatsinnit annissuisut. Inuit ilaat oqaluttut; Ujaqqanik erlinnartunik pinnersaasiassanillu anngiortumik nunatsinniit annissuinerarlugit. Inuit ilaat oqaluttut; Takornarissaninngooruna angallasiartorlutik sullissiartorlutik nunatsinnukartartut.

Tamanna pillugu, uangattaaq tingerlaataannarsorlutik nunatsinnut tikittartut sulerisarnersut susarnersullu paasisaqarfigerusulerpara. Tamanna pillugu Naalakkersuisunut apeqquteqaat imaattoq ingerlateqqippara.

Qinnutigissavara apeqquteqaatima ullut suliffiusut qulit iluanni akineqarumaartut.